

Presentacion den Parlamento riba raport final di exploracion di petroli y gas

Gobierno y Parlamento mester dicidi cual t'e proximo paso den exploracion di mineralnan



PLANNAN cu ta trahando riba dje pa casi dos aña caba dor Minister di Finanza y Energia, ing. Mike de Meza riba asunto di exploracion di gas, ta muestra di ta bayendo riba e bon caminda.

Den cuadro di esaki y basa riba tur e trabou cu a wordo haci te n'e momentonan aki, tabatin un presentacion ayera den Parlamento di Aruba.

Minister de Meza a splica cu

for di momento cu Gabinete Mike Eman a sinta, a palabra di lo sondea e posibilidad di zeta of gas den awanan territorial di Aruba. Mas ainda si mira cu algun tempo prome a keda descubri un reserva grandi di gas natural den teritorio Venezolano, cu ta keda masha cerca di esun di Aruba. N'e momento ey e interes pa explora gas na Aruba a bira mas grandi.

Tabata basa riba descubrimiento

di e reserva di gas natural ariba menciona, cu Aruba a wordo acerca door di tres compania grandi: Heritage di Inglatera, Repsol di Spaña y Northern Petroleum di Merca. E interes tabata pa exploracion di petroli of gas natural.

Gobierno a sinta na mesa e tempo ey cu CAP su Director, Armando Curet, pa mira con ta sigui cu e proceso ey.

A forma un comision di experto local, di companianan di Utili-

dad y CAP, asisti pa un consehero di Inglatera y expertonan Hulandes, pa studia tur e informacion cu tin riba mesa y papia cu e companianan interesa.

Despues di basta reunion y discucion, e comision a yega na un consejo cu a wordo presenta na Gobierno. Minister di Meza a splica cu a scucha esaki, y pa ta masha transparente cu un asunto asina importante, a dicidi pa laga esnan cu tabata envolvi den e procedura, duna un presentacion na Parlamento di Aruba.

CAP a duna su presentacion na Parlamento, cu asistencia di expertonan Europeo, di e compania Fugro Development and Production.

Tambe Departamento Economico di Hulanda tin un experto den otorgamento di permiso y estudionan cu tabata presente, y a duna e Parlamentarionan un

splicacion di con un procedura asina mester bay, den caso cu mester yega na loke ta un "licitacion".

Den Parlamento, caminda tambe tabata presente Prome Minister mr. Mike Eman y expertonan di Gabinete Mike Eman, a wordo muestra di e opcionnan cu tin riba mesa y e diferente opcionnan cu tin pa sigui cune. E mandatario a splica cu si e material of mineral por wordo haya den awa di Aruba, e ta di e isla.

Den pasado tabatin acuerdonan firma, cu si Aruba haya mineral, 80% ta di Aruba y 20% p'e otro islanan di Antias. Pero e situacion awendia ta completamente diferente. E ta kere cu e reparticion ta keda mescos, pero e 20% ta wordo parti den un forma mas grandi cu e otro islanan. Un reserva asina, en principio ta di pais Aruba.